

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 5
Marso 7, 2006
www.philippinerevolution.org

Editorial

Pamatukan ang terorista nga pagginahum sang rehimeng Arroyo

Makaligad lang sang isa ka simana, napilitan si Gloria Arroyo nga bawion sining Marso 3 ang iya gindeklarar nga proklamasyon nga nagapaidalum sa bilog nga pungsod sa "state of emergency." Suno sa iya mga idu-ido, nadula na kuno sa kadak-an ang pamahug sa seguridad sang pungsod. Gindeklarar niya ang Presidential Proclamation 1017 sadtong Pebrero 24.

Ang matuod, ginsumalang sang malapnagon kag mabaskog nga pagpakamaut ang PP 1017 sa sulod kag guwa sang Pilipinas. Ginkwestyon ang ligalidad sang deklarasyon. Wala ginbaton ang mga ginasiling nga basehan sini. Ginsuway ang mga pagdumili sa rali kag iban pa nga pagprotesta. Labing naglapad ang pagbato sang pumuluyo kag mga panawagan nga patalsikon si Arroyo.

Ginhimo ni Arroyo ang pakitang-tao nga pagbawi sa PP1017 bangud nabudlayan ini nga atubangon ang malaparan nga pagkunda, kag agud unahan ang anuman nga posible nga desisyon sang Korte Suprema bahin diri. Pero padayon ang iya pagpaniplang, pagbinutig kag pagpamigos. Wala ini sang kinalain sa paltik nga pagdula ni Marcos sa layi militar sang ideklarar niya ang "normalisasyon" sadtong 1981.

Insigida sa pakuno-kuno nga pagbawi sa PP 1017,

gindeklarar ni Arroyo kag iya mga tinawo nga padayon nga lagson sini ang kuno mga "kahimbon sa kudeta." Kadungan sini ginpagguwa ang mga mapiguson nga regulasyon para sa masmidya agud pat-uron nagasunod ini sa mga "talaksan" sang rehimen. Padayon nga target sang mapiguson nga mga tikang ang malapad nga nahahiliugyong prente sang mga patriyotiko, demokratiko kag progresibong pwersa kag iban pa nga pwersa nga nagabato sa rehimen.

Nagapamahug ang rehimen nga igabalik sini ang PP 1017 ukon kapareho sini "kon ginahingyo liwat sang kahimtangan." Padayon ang lapnagon nga kontra-open-siba sang nagaharing papet kag pasista nga rehimeng Arroyo para ipabilin ang kaugalingon sa poder kag ipataw ang mas malaut pa nga mga pagsulundan nga antinasyunal, kontra-demokratiko kag kon-



Mga tampok sa isyu na ini...

Pasismo sa idalom sg Proclamation 1017
PAHINA 3

Sabat sg BHB sa Proclamation 1017
PAHINA 5

"People Power," una nga halad sg Sine Proletaryo
PAHINA 12

tra-pumuluyo.

Nagapabilin ang todo nga kampanya sang anihilasyon batuk sa mga rebolusyonaryo kag progresibong pwersa nga ligal kag iligal, armado kag di armado, amo man batuk sa iban pa nga demokratikong pwersa, oposisyon pulitikal kag ordinaryong pumuluyo nga nagatib-ong sa pagtapos sa ginakangil-aran nga garuk, brutal, papet kag iligal nga rehimen.

Sa atubang sang mga ini, wala sang iban nga pagapilian ang mga pwersa nga anti-Arroyo kundi ang pagpalapad kag pagpasingki sang mga pangmasang paghulag kag padayon nga pagbuyok sa nagkalain-lain nga sektor sang katilingban, lakip ang mga matarung nga upisyal sang gubyerno kag mga pwersa militar kag pulisya, nga mag-atras na sang suporta sa rehimeng Arroyo.

Kinahanglan aktibo nga mangu-na ang mga rebolusyonaryong pwersa sa determinado nga pagbuyagyag kag pagkundenar kag lubos nga pagpasabat sa papet kag pasistang rehimeng Arroyo.

Kinahanglan magtinguha ang mga rebolusyonaryo kag progresibong pwersa nga dugang pa nga palaparon ang mga alyansang anti-

Arroyo kg antipasista sa pungsod-non nga sakup kag sa nagkalain-lain nga rehiyon kag lokalidad. Pwede matukod ang isa ka bag-ong alyansa para masakup ang mas malapad pa nga kubay ukon indi gani malikawan ang pagpamigos sang pasistang rehimen.

Nagaluntad ang mga basehan para magsikad sang lubos-kabaskog ang pumuluyo batuk sa rehimen nga nagapadayon sa pagkapasista. Sakdagon kag engganyuhon naton ang diwa nga nagabato sa kubay sang pumuluyo kag palapnagon ang maisog nga pagsuway sa mga pasista nga mandu. Magtukod sang nagkalain-lain nga sentro sang pagbatu nga may malapad nga payong sang nagahiliugyong prente.

Padayon nga isentro ang mga pagtinguha nga pukawon, organisahon kag pahulagon ang pumuluyo sa basehan sang mga tampok nga isyu sang korapsyon, kagulutmon kag pagpang-ulipon kag hugot nga iangot ini sa panawagan nga patalsikon si Arroyo sa Malakanyang. Nagakadapat lang nga sukton ang garuk nga gubyernong Arroyo sa nadula ukon nadispalko nga mga pondo, ipamilit ang pagbalik sang mga ginpatuyang nga pondo sa mga

tunay nga dapat makabenepisyo diri kag pasabton ang rehimen sa pagpamuyong kag iban pang kaangot nga krimen.

Tipunon ang kaakig sang pumuluyo sa pangurakot sang rehimeng Arroyo sang binilyon nga pondo halin sa kaban sang banwa samtang lapnagon ang kagulutmon kag kaimulon sang pumuluyo. Kundena-hon ang pagpuga kag pagpangulipon sang rehimen sa malapad nga masa sang pumuluyo paagi sang mga programa kag pagsulundan pabor sa mga imperyalista, dalagku nga agalon nga mayduta, daku nga burgesya-kumprador kag dalagku nga korap nga upisyal sang iya rehimen.

Labi nga nagataas ang rebolusyonaryong kamuklatan sang pumuluyo sa matalom nga pagpaathag sa mga ugat sang ila kagulutmon kag kapigaduhon-ang pagginahum sang imperyalismong US, pyudalismo kag burukrata kapitalismo sa pungsod. Pagapuntiryahon sini indi lang ang papet kag pasistang rehimeng Arroyo, kundi pati ang bilog nga nagahari nga sistemang malakolonyal kag malapyudal.

Dapat ibandera ang mga isyu nga ini sa mga malahigante nga paghulag sa bilog nga pungsod. Kadungan sang pagpasingki sang paghimakas anti-Arroyo, kinahanglan papagsikon ang mga pangmasang paghimakas kag ang kahublagang propaganda para sa demokratikong rebolusyon sang banwa.

Labi pa nga pasingkion sang Bag-ong Hangaway sang Banwa ang mga taktikal nga opensiba kag rekrutment sang bag-o nga mga Pu-lang hangaway. Labi nga kinahanglanon nga pasingkion ang ar-madong rebolusyon para epektibo nga batuan ang mga kahayupan kag pagpangulipon sang pasistang rehimen kag itudlo sa malapad nga pumuluyo ang husto nga rebolusyonaryong direksyon. Kinahanglan mas palaparon kag mas pasunsunon



Tuig XXXVII No. 5 Marso 7, 2006

Ang *Ang Bayan* ginabantala sa leng-wahe nga Pilipino, Bisaya, Iloko, Hili-gaynon, Waray kag Ingles.

Mahimo ini i-download halin sa *Philippine Revolution Web Central* nga ma-kit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga arti-kulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

Pamatukan ang terorista nga paggi-nahum sg rehimeng Arroyo	1
Proclamation 1017 kag General Order 5	3
Mga protesta sg mga Pilipino sa US, Canada, Hongkong	4
Mga aksyong militar sg BHB	5
Ambus sg BHB sa Negros	6
Padayon ang banggianay sa sulod sg AFP	8
Si Lt. Crispin Tagamolila	9
50 tuig sg anti-rebisyunismo	10
Una nga halad sg Sine Proletaryo	12

Sa luwas sang pungsod

Paghilway sg kababaihan sg China	13
Bisita ni Bush sa India kag Pakistan	15

Balita	16
---------------	-----------

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

ang mga basehang taktikal nga opensiba. Kinahanglan man hatagan sang dugang nga partikular nga atensyon kag mas pasusunon ang mga espesyal nga taktikal nga opensiba nga nagaigo sa ulo kag nagapaabot sang matunog nga mensahe nga pangpulitika sa pasistang rehimen kag sa bilog nga pumuluyo.

Dapat man determinado nga pamatukan kag paslawon ang binuang nga pagpanalakay kag kampanya sang anihilasyon batuk sa mga rebolusyonaryo kag progresibong pwersa. Lauman ang pagkambyo sang pasistang rehimen sa pinakamapintas kag pinakamasingki nga pagpamigos batuk sa mga tunay nga rebolusyonaryo kag progresibong pwersa sa kaumhan kag kasyudaran. Subong pa lang nagakatabo na ang mas malaparan, mas brutal kag mas baraghal pa nga pagpatuman sang polisiya sang pagpamatay kag pagpangabuso sa mga progresibong pwersa kag mga organisasyon sang basehang masa. Samtang malig-on nga nagapursiger sa pagpasulong sang mga paghimakas sang pumuluyo, kinahanglan pagsanyugon ang mga tikang para amligan ang mga progresibong pwersa kag paslawon ang pagpanghalit sang pasistang kaaway. Sandig diri, dapat dugang nga palaparon kag padalumon ang kahublagang tago sa kasyudaran, samtang ginainsister ang mga ligal nga kinamatarung kag mga hayag nga aksyong masa.

Kadungan sini, ang mga pwersa nga markado sang kaaway para sa likidasyon ginaabisuhan nga magsaylo sa kaumhan para magsilong sa proteksyon sang mga rebolusyonaryong armadong pwersa ukon maghulag sa patag sang armadong paghimakas.

Sa amo man, kinahanglan padalumon ang kahublagang tago kag ang pagsekreto sa kaumhan. Seryoso nga preparahan ang peligro sang mas malaparan nga pagpamatay kag pagmasaker batuk sa kahublagang masa sa kaumhan. Hanason ang mga organisasyong masa kag mga baryo sa pagpakig-gitgitan kag paglikaw sa pagpamwersa, pagpamahog kag pangpang-ipit sang mga pasistang tropa. Tanan nga mga elemento nga pat-ud ukon posible nga target sang asasinasyon sang mga pasista nga pwersa sa gilayon dapat magbag-o sang pamaagi sa paghulag kag hugot nga maglikaw sa mga markado nga lugar, pagkahon kag pagpadron sang kaaway.

Tanan nga nagapamuno nga komite sang Partido dapat maghatag sang maid-id kag mahalong nga atensyon para pat-uron ang madasig, hilway kag nagapadayon nga ilig sang komunikasyon sa kada sakup kag sa mga mas mataas nga organo sang Partido. Siguruhon ang madasig kag hilway nga ilig sang mga report kag instruksyon sa tunga sang mga nagapamuno nga komite kag mga ginapamunuan nga yunit sang Partido.

AB


Proclamation 1017 at General Order No. 5

Mga pasistang atake sa mga pwersang anti-Arroyo

Isa sa mga pangunahon nga target sang Presidential Proclamation (PP) No. 1017 nga nagdeklarar sang "state of national emergency" (SONE) kag nagpagguwa sang katuwang nga General Order (GO) 5 amo ang mga pwersa nga nagabug-os sang malapad nga nagahiliugyong prente batuk sa pagginahum ni Arroyo, ilabi na ang mga lider sang mga progresibong partido.

Agud hatagan-rason ang ginahimo nga malaparan nga pagpamigos, ginpagguwa ni Arroyo nga nagplano sang isa ka kudeta ang isa ka alyansa nga "Wala-Tuo" nga ginadalahan kuno sang mga rebeldeng suldado, sang Bag-ong Hangaway sang Banwa, mga partidong oposisyon kag mga ligal nga organisasyon. Nagpagguwa ang Department of Justice (DOJ) sang isa ka listahan kon sa diin naghalu-halo ang ngalan sang mga kilala nga lider sang PKP-BHB-NDF, mga suldado kag upisyal nga anti-Arroyo kag mga lider sang ligal nga progresibong partido.

Gin-aresto nga wala mandamyento si Rep. Crispin "Ka Bel" Beltran sadtong Pebrero 25 nga supak sa mga sandigan nga tawhanong-kinamatarung kag sang wala bisan isa ka konsiderasyon sa iya kahimtangan bilang kongkresista. Para lang mapriso, daku nga tinonto nga gingamit sang DOJ ang paso na nga kaso sang rebelyon nga ginpasaka sang diktaduryang Marcos batuk kay Ka Bel sadtong 1985. Sa atubang sang malaparan nga pagpakamalaut diri, nagpasaka sang panibag-o nga kaso nga rebelyon ang DOJ batuk kay Ka Bel base sa kuno pagka-imbolbar niya sa tuyo nga kudeta. Bangud tubtub buhi nga pagkahunong ang penalidad sa kaso nga rebelyon, indi maggamit ni Ka Bel ang ginahatag nga imunidad sa mga kongkresista batuk sa pagaresto bangud aplikable lang ini kon ang ginaatubang nga kaso may penalidad nga anum ka tuig nga pagkabilanggo ukon



mas manubo pa.

Halos duha ka simana na nga nakahunong sa Camp Crame ang 73-anyos nga si Ka Bel. Sining ulihi, napilitan ang rehimen nga temporaryo siya isulod sa PNP General Hospital bangud sa iya alta-presyon kag *diabetes*. Solo ang iya pamilya kag mga abugado lang ang makabisita sa iya. Sa pihak sini, adlaw-adlaw may nagapiket sa guwa sang Camp Crame agud ipamilit ang pagpahilway sa iya.

Gintuyo man sang rehimen nga arestuhon ang mga kongresista nga sanday Satur Ocampo, Teodoro Casino kag Joel Virador sang Bayan Muna, Liza Maza sang Gabriela Women's Party kag Rafael Mariano sang Anakpawis. Pareho ni Ka Bel, gindalahig man sila sa kuno plano nga kudeta. Solo ang malaparan nga pagpamatuk kag pagpamalibad sang ila mga kapareho nga kongresista ang nagapugong sa pag-aresto sa ila sang PNP. Nakapaidalum sila subong sa kustodiya sang Kongreso kag masobra isa ka simana na nga nagaestar sa sulod sang Batasan. Wala sang adlaw nga maglipas nga wala sang nagapahayag sang suporta sa ila halin sa nagkalain-lain nga mga personahe kag organisasyon.

Sa listahan man sang mga ginapaaresto amo si anay senador Gringo Honasan kag mga aktibo kag retirado nga upisyal kag suldado nga ginasing kabahin sa pag-organisa sang mga grupong anti-Arroyo sa sulod sang AFP kag PNP.

Ginapahug man ni Arroyo si anay Presidente Corazon Aquino nga wala untat sa panawagan nga magbiya si Arroyo. Si Aquino ang matuod nga target sang pilit nga pagdalahig sa kuno tuyo nga kudeta sang utod ni Aquino nga si anay Kongresman Jose "Peping" Cojuangco kag Pastor "Boy" Saycon.

Ginaipit man si anay Presidente Joseph Estrada nga ginaakusahan nagpondo sa paghulag sang mga rebeldeng suldado. Gin-ako ni Estrada

Mga protesta sang mga Pilipino sa US, Canada, kag Hongkong

Padayon nga nagasulong ang mga protesta sang mga Pilipino sa iban nga pungsod batuk sa Proclamation 1017 kag sa peke nga pagbawi sini. Sa US kag Canada, nagapadayon ang malaparan nga kampanya nga petisyon sang mga progresibo kag demokratikong organisasyon sang mga Pilipino nga migrante kag mga tagasuporta nila kontra sa bag-o nga pasista nga dikatadurya tubtub nga mapahalin si Arroyo sa poder.

Sadtong Marso 1 ginsuguran ang paglunsar sang sostenido nga mga hublag protesta batuk sa PP 1017 sa pagpamuno sang Gabriela Network USA. Nangako sila nga magahimo sang adlaw-adlaw nga mga demonstrasyon kag piket sa atubang sang Philippine Embassy kag mga konsulada sang Pilipinas sa nagkalain-lain nga parte sang US. Sa Chicago, Los Angeles, San Francisco kag Seattle, indi napunggan sang pag-ulan sang nyebe ang pagmartsa sang mga Pilipino kag mga tagasuporta nila kontra sa mga pasista nga tikang ni Arroyo. May mga paghulag man ang nagkalain-lain nga makabanwa kag demokratikong organisasyon sa New York kag Los Angeles sadtong Pebrero 27. Sa Canada, nagpagguwa sang pahayag sang pag-isa sa pumuluyo nga Pilipino sadtong Pebrero 24 ang lain-lain nga grupo nga nagasakdag sang tawhanong kinamatarung kag mga organisasyon sang migrante nga Pilipino.

Sa Hongkong, naglunsar man sang rali ang mga migrante sadtong Pebrero 27 sa pagpamuno sang United Filipinos in Hongkong (UniFil) kag Migrante International. Sa Bangkok, Thailand, ginsulod sang 30 ka myembro sang migrante nga Pilipino sadtong Marso 2 ang embahada sang Pilipinas kag gin-imbatar si Ambassador Antonio Rodriguez nga magpartisipar sa mga protesta nga kontra-Arroyo.

Nagapahayag man sang pagkabalaka kag pahiliusa sa paghimakas para sa kahilwayan kag demokrasya sa Pilipinas ang Philippine European Solidarity. Samtang, ginlunsar sadtong Pebrero 28 sang Pilipino Resource Center sa Oslo, Norway ang isa ka kampanya para sa pagpadala sang *email* para kundenahon ang PP 1017.

AB

da nga ang ginapamunuan niya nga Saludo sa Kawal Pilipino Foundation naghatag sang kabilugan nga P8 milyon sa mga yunit militar kag pulis nga ginainitan subong sang rehimen. Pero ginaathag niya nga ini ginhatag bilang pamaskua kag nagkadto sa ila kooperatiba kag wala ginaderetso sa mga yunit-militar.

Kadungan man, padayon ang pagbantay sa hulag sang mga aktibista. Naobserbahan nga may pila nga nakilala nga di-unipormado nga pulis nga nagaulu-alihid sa guwa sang upisina sang Kilusang Mayo Uno sa Quezon City. Sadtong Pebrero

25, kay isa ka hubon sang mga SWAT nga nagsulod sa kampus sang UP sa Diliman, Quezon City kag nagapan-gita sang mga lider estudyante didto. Pati ang mga empleyado nga nagatrabaho sa upisina sa Kongreso sang mga progresibong partido ginasundan sang mga ginapatihan ahente sang PNP.

Pagpamigos sa masmidya

Target man sang mapiguson nga pagginahum ni Arroyo ang masmidya. Pangunahon na diri ang *The Daily Tribune*, isa ka pahayagan nga kritikal kay Arroyo kag aktibo nga nagabuyag sang mga anomalya kag korapsyon. Sining Marso 3, gina-

pasakaan sang kasong sedisyon ang puno nga editor sini nga si Ninez Cacho-Olivarez kag mga kolumnista sini nga sanday Ike Seneres kag Herman Tiu-Laurel.

Bag-o sini, ginreyd sang PNP Criminal Investigation and Detection Group (CIDG) ang upisina kag imprenta sang *Tribune* kag masobra isa ka simana nga ginpwestuhan ang ila upisina. Sadto naman nga Pebrero 28, "ginbisita" sang pila ka tinawo sang PNP ang upisina sang dyaryo nga *Abante* kag nagpamangkot bahin sa mga upisyal sini. Sini naman nga Marso 3, nagpag-

guwa ang National Telecommunications Commission (NTC) sang isa ka memorandum kon sa diin ginatalana sini ang mga "talaksan" nga dapat sundon sang mga kumpanya sa brodkas. Ginapamilit sang NTC sa mga kumpanya sa brodkas nga "indi ipagamit ang ila mga pasilidad sa mga nagapanawagan sa pagpukan sang gubyrno paagi sa kalakasan, kag indi pahanugutan ang pagbrodkas sang ano man nga tendensya nga magsuhestyon ukon mag-engganyo sa pagtraidor, rebelyon ukon sedisyon ukon magtuga sang pat-ud kag gilayon nga peligro sa estado."

Antes sini, nagpamahug ang NTC nga mahimo sini ipaidalum sa kontrol sini ang ano man nga kumpanya nga pangbrodkas nga wala nagasunod sa mga "talaksan" nga gintalana sang gubyrno. Liwat sini nga ginpagguwa ang mga daan nga memorandum nga hayag nagadumili sa mga brodkaster nga maghatag sang oras sa ere sa mga ginabansagan "kaaway sang estdo."

Kadungan sini, gin-ako sang DOJ nga ginabantayan sini ang pito ka kumpanya sa brodkas.

Ginainitan man ni Arroyo ang ABS-CBN nga padayon nga na-

Sabat sa Proclamation 1017

Nagasulunod nga aksyong militar sang BHB

Nagasulunod nga mga aksyong militar ang gin-sabat sang mga yunit sang Bag-ong Hangaway sang Banwa (BHB) sa Proclamation 1017 ni Gloria Arroyo nga nagpahamtang sa bilog nga pungsod sa *state of national emergency*. Ang mga ini amot sang BHB sa pagpadali sang pagpukan sa rehimeng Arroyo.

Marso 3, Mindoro. Ginlambatan sang isa ka platon sang Lucio de Guzman Command sang BHB ang mga tropa sang Regional Mobile Group (RMG) sang Philippine National Police sa Sityo Minolo, Barangay San Isidro, Puerto Galera sa Oriental Mindoro. Ginpalukpan sang mga Pulang hangaway sang bomba ang ila ginasakyan nga *dump truck* bandang alas-6 sang aga. Duha ka elemento sang RMG ang gilayon nga napatay samtang napilasan ang tatlo pa.

Ginalagas sadto sang nasambit nga yunit sang PNP ang isa ka yunit sang BHB.

Samtang sa isla sang Mindanao, nakalunsar ang mga yunit sang BHB sang 18 nga armadong atake batuk sa mga tropa kag gaway sang mga pasistang rehimen halin sang gindeklarar ang PP 1017 tubtub sadtong Pebrero 28. Lakip sa mga ini ang masunod:

Pebrero 27, Barangay Zapanta, Kitcharao, Agusan del Norte. Isa ka suldado ang napatay sa operasyon nga harasment sang BHB-Front 16 batuk sa duha ka platon sang 30th IB nga nang-*hostage* sa bilog nga barangay bilang panaming batuk sa BHB.

Pebrero 26, Barangay Bugsukan, Butuan City. Ginharas sang mga katapu sang BHB-Front 21 ang nagaoperasyon nga tropa sang 29th IB. Isa ang napatay sa kubay sang mga suldado.

Pebrero 25, Barangay Cabongbongan, Surigao City. Indi maisip ang kaswalti sang kaaway sang ginharas sang mga katapu sang BHB-Front 19 bandang alas-2:12 sang kaaganhon ang detatsment sang 23rd IB kag CAFGU.

Barangay Zapanta, Kitcharao, Agusan del Norte. Indi man maisip ang kahalitan sa kaaway sa duha ka ambus nga ginhimo sang mga Pulang gerilya sang Front 14 bandang alas-10:30 sang aga kag 11:30 sang udto batuk sa duha ka nagapatrulya nga kolum sang 30th IB sang Philippine Army.

Barangay Kasapa, Loreto, Agusan del Sur. Gindisarmahan sang BHB-Front 34 ang isa ka elemento sang Civilian Volunteer Organization kag nakuha sa iya ang isa ka .38 rebolber, isa ka radyong VHF kag tatlo ka *bulletproof vest*.

Pebrero 24, Barangay Masara, Maco, Compostela Valley. Gindisarmahan sang mga Pulang hangaway sang BHB-Front 27 ang mga gwardya sang Crew Gold Mining Corporation kag nakuha ang duha ka pistolang .45, siyam nga .38 rebolber kag anum ka *shotgun*. Nakakumpiska man sang siyam ka VHF *hand-set radio* kag isa ka VHF *base radio*. Isa ka gwardya nga nagbatu ang napilasan.

Alas-8 sang gab-i sa Sityo Apa-apa, Bangonay, Jabonga, Agusan del Norte. Ginharas sang mga hangaway sang BHB Front 16 ang nagaoperasyon nga mga tropa sang 30th IB sang Philippine Army. Bunga sini, nagtabo ang *misencounter* ang mga tropang militar kon sa diin duha ang napatay kag isa ang napilasan sa kubay sang mga suldado.

AB

Mga suldado, gin-ambus sang BHB sa Negros

Lima ka suldado ang napatay kag duha ang napilasan sa duha ka separado nga ambus sang Bag-ong Hangaway sang Banwa (BHB) sa mga elemento sang Philippine Army sa Candoni, Negros Occidental sadtong Enero 29.

Ginlambatan sang isa ka yunit sang BHB-Roger Mahinay Command ang isa ka kolum sang 61st IB nga nagahana magsalakay sa isa ka kampo sang BHB bandang alas-3 sang hapon sadtong adlaw nga ina. Pumwesto ang mga hangaway sa mga lugar nga natumod nila nga pagaagyan sang mga suldado gani madinalag-on nila nga naambus ang nasambit yunit. Tatlo sa mga suldado ang napatay kag isa ang napilasan sa isa ka oras nga inaway.

Bandang alas-5 sang hapon, ginlambatan naman sang BHB ang reimporsment sang mga yunit militar. Duha ka suldado ang naigo kag gilayon nga napatay. Suno kay Ka Nilo Magtanggol, tagapamaba sang Roger Mahinay Command, wala sang napatay ukon napilasan sa bahin sang BHB sa duha ka inaway. **AB**

gakoher sa nagkalain-lain nga paghulag sang mga pwersang anti-Arroyo. Nagpamahug ang DOJ nga pasakaan sini sang kaso nga "*inciting to sedition*" ang ABS-CBN angot sa ila nga pagbalita sa mga hitabo sa Fort Bonifacio sadtong Pebrero 26.

Proclamation 1017, labi nga nagpainit sa pagbato sang pumulu-yo

Wala malingkang ang mga pumulu-yong Pilipino sa pihak sang mga pahadlok kag pagpatuman sang dugang nga mapiguson nga tikang sang rehimeng Arroyo halin nga madeklarar kasg bawion ang PP 1017.

Sadto mismo nga Pebrero 24, pila ka pulo ka libo ang nagrali sa Ayala agud dumdumon ang ika-20 nga anibersaryo sang EDSA 1 kag isinggit ang pagpatalsik kay Arroyo. Pagpakita ini sang kolektibo nga pagsupak ang pumuluyo sa PP 1017 nga ginatapalan sang pulis agud balabagan kag mapintas nga bungkagon ang mga nauna nga pagtilipn sang libu-libo nga pumuluyo sa EDSA Shrine. Halos 100 nga raliyista ang gindakup didto mismo sang mga

pulis.

Kasunod sini, halos adlaw-adlaw ang wala kag tuo nga mga paghulag batuk sa PP 1017 kag nagadepensa sa kinamatarung nga magpabutyag kag magtipon.

Halos 20 nga nagkalain-lain nga mga organisasyon sang mga abugado, mga partido kag pila ka indibidwal ang nagkadto sa Korte Suprema agud magpasaka sang kaso nga nagakwestyon sa SONE, PP 1017 kag mga ginahimo nga tikang ni Arroyo kasunod sini. Lakip sa mga nagpasaka sang reklamo ang Integrated Bar of the Philippines, Alternative Law Group, Public Interest Law Center, mga propesor sang UP Law Center, Kilusang Mayo Uno kag sanday House of Representatives Minority Leader Cong. Francis Escudero kag Cong. Lorenzo Tanada III sang Quezon. Pagapamatian ang mga reklamo nga ini sa Marso 7.

Ginatus-gatos naman ang nagtipon sa guwa sang Fort Bonifacio sadtong Pebrero 26, sa sulod sang kampus sang University of the Philippines (UP) sa Diliman, Quezon City kag sa Ayala Avenue, Makati bilang suporta sa aksyong protesta

sang mga suldado sang Pihilippine Marine sa sulod sang Fort Bonifacio (lantawon ang kaangot nga artikulo).

Sa mga masunod nga adlaw, tumampok ang mga paghulag sang mga estudyante kag manunudlo sa sulod sang UP. Gindeklarar sang mga estudyante kag manunudlo diri nga ang ila kampus hilway sa PP 1017. Ginatus-gatos ang nagpasakup sa halos adlaw-adlaw nga mga protesta sa sulod sang eskwelahan. Lakip diri ang malaparan nga *walkout* sang mga estudyante kag manunudlo sadtong Pebrero 27 kag nagapadayon nga *vigil* (pagpulaw). Ginpahayag ni Dr. Emerlinda Roman, presidente sang UP, nga padayon nga ginatibong sang bilog nga sistema sang UP ang kinamatarung sa pagpahayag kag pagtipun-tipon.

Amo man, nagpagguwa sang upisyal nga panindugan sa mga pasista nga tikang ni Arroyo ang District Council of the De La Salle Brothers, ang University Council-University of the Philippines sa Dili-man kag ang Ateneo de Manila University.

Sa pagpanguna sang Senado ang SONE bilang paglapas sa konstitusyon kag Bill of Rights. Sa pagpanguna ni Sen. Franklin Drilon, ginpasar sa Senado ang resolusyon nga nagakundenar sa PP 1017 kag nagatalana sang mga pagbista para pamatukan ini. Luwas kanday Sen. Lito Lapid kag Miriam Santiago, nagpahayag sang protesta ang mga senador paagi sang pagsuksuk sang itom nga "armband." Nagplastar man sang reklamo si Sen. Jamby Madrigal sa Office of the UN High Commissioner on Human Rights sa Geneva, Switzerland kaangot sang paglapak ni Arroyo sa tawhanong kinamatarung.

Kadungan sini, ginahanda na sang mga senador ang pagpasaka sang kaso nga pagpamuyong batuk kay Arroyo kag iya mga kahimbon nga puno nga upisyal sa Department

of Agriculture (DA) sa binilyun-bilyon nga kantidad sang mga pondo para sa abono nga ginkawat nila kag ginamit sa nagligad nga eleksyon.

Madamu man sa mga alyado ni Arroyo sa Kongreso ang nanindugan batuk sa PP 1017. Nagaisa ang bilog nga Kongreso sa resolusyon nga naghataag sang kostudiya sa lima ka kongresista nga gusto arestuhon sang PNP kag nagakundenar sa mga mapiguson nga tikang kaangot sang PP 1017.

Ululupod man nga nagpabutyag sang pagpamatuk sadtong Pebrero 28 ang dalagku nga organisasyong relihiyoso lakip ang National Council of Churches of the Philippines (NC-CP), United Churches of Christ of the Philippines (UCCP), Iglesia Filipina Independiente, Catholic Rural Missionaries of the Philippines, Ecumenical Bishops Furom, United Methodist Church kag Promotion of Church People's Response (PCPR).

"Indi kami mapahug!" ang nangin sabat sang mga upisyal kag tinawo sang *The Daily Tribune*, ABS-CBN kag

Abante sa mga tuyo nga pakulbaan sila. Liwat nangin aktibo ang National Press Club (NPC) sa pagpakamalaut sa mga

pagpang-
ipit sa mas-

midya. Sa mismo nga kudal sang NPC ginhiwat ang mga hublag protesta sadtong Pebrero 27 nga gintambungan sang National Union of Journalists of the Philippines (NUJP), Alyansa ng mga Filipinong Mamamahayag, Malacanang Press Corps, Progressive Tri-Media of Pasay City, National Bureau of Investigation Press Club, Manila Police District Press Corps, Camanava Press Corps kag Philippine Drug Enforcement Agency Press Corps.

Naglunsar man sang rali ang 500 abugado kag nagkalain-lain nga sektor sadtong Marso 3. Sa pagpanguna sang Integrated Bar of the Philippines, nagmartsa sila padulong sa EDSA Shrine sa Ortigas Avenue kon sa diin sila gin-abangan sang mga pulis kag pwersahan nga ginpungan magrali, bisan pa pagkatapos bawion ni Gloria Arroyo ang PP 1017. Nagpabutyag man sang pagpamatuk ang Makati Business Club kontra sa PP 1017 sa kakulba nga labi sini nga palainon ang ekonomya.

Konsolidasyon sang diktaduryang Arroyo

Sa pihak sang ginapagguwa sining Marso 3 nga ginbawi na ang deklarasyon sang PP 1017, padayon na nagaluntad ang mga pasistang polisiya kag ang pagginahum nga mala-layi militar ni Gloria Arroyo. Nagapabilin ang mabangis nga epekto sang PP 1017 kag GO 5 batuk sa mga kaaway sang rehimen. Nagapabilin ang pamahug sang pag-aresto sa lima ka tiglawas sang mga prog-


sibong partido kag ang pagpang-ipit sa midya.

Mismo si Arroyo ang nagsiling nga nakahanda ang iya rehimen nga paliwat-liwat nga mag-isyu sang mga proklamasyon pareho sang PP 1017 kada magluntad kuno ang basehan para diri. Wala man sang ginhimo nga pagbawi si Arroyo sa GO 5 nga amo ang ginagamit sang AFP kag PNP sa pagpamigos sa pumuluyong Pilipino.

Bilang bahin sang pagpalig-on ni Arroyo sa gahum, liwat sini nga ginaspasan sini ang pagkasa sang Cha-cha (pagbag-o sa konstitusyon) sa katung-anan sang tuig. Luwas sa katuyuan nga himuon nga mas kontra-nasyunal kag kontra-demokratiko ang konstitusyon sandig sa dikta sang US, katuyuan man ni Arroyo ang mag-angkon sang mga gahum ala-Marcos bilang magkadungan nga presidente kag puno nga ministro. Ini ang kaundan sang mga ginaduso sang rehimen nga "transitory provision" nga nagduso kay Vicente Paterno nga magbiya sa Constitutional Commission nga naghimo sang ginaproponer nga mga pagbag-o.

Bahin man sang paglatag ni Arroyo sang mas malapad nga kontrol kag gahum sa pulitika ang pagkonsolida niya subong sang kapot sa mga lokal nga gubyrno paagi sa pagbutang kay Ronaldo Puno bilang sekretaryo sang Department of Interior ang Local Government (DILG).

Sanday Arroyo man ang yara sa likod sang paglunsar sang kudeta sa sulod sang Liberal Party para mapatalsik si Sen. Franklin Drilon bilang presidente kag ibaylo sanday Manila Mayor Lito Atienza at Chief of Staff Mike Defensor sa liderato. Agud magamit ang pondo sang gubyrno para sa mga pamasaha kag iban pa nga gastos sang mga ginhakot para sa paltik nga kumbensyon, ginpagguwa sang Malakanyang nga isa ini ka seminar sang DILG para sa mga lokal nga lider sang barwa. Wala ini ginkilala ni Drilon.



Padayon ang banggianay sulod sang AFP

Padayon nga nagalala ang banggianay sa sulod sang AFP. Ang pinakaulihi nga protesta sang mga suldado amo ang ginbunga sang pagtuyo ni Gloria Arroyo nga kakason sa kubay sini ang mga upisyal kag suldado nga nagabato sa iya padayon nga pagginahum. Indi sini matabunan bisan wala untat ang Malakanyang sa pagsiling nga bilog ang suporta sang AFP sa gubyer-nong Arroyo.

Mismo si AFP Chief of Staff Gen. Generoso Senga ang nagsiling nga ginsugilanon siya sadtong Pebrero 23 nanday Brig. Gen. Danny Lim, hepe sang 1st Scout Ranger Regiment, kag ni Col. Ariel Querubin, hepe sang 1st Marine Brigade agud imbitahon siya nga magpasakup sa plano sang madamo nga tinawo sang AFP kag PNP nga magtambong sa mga pang-masang protesta nga nakatalana sa masunod nga adlaw. May salig sanday Lim nga makuha nila ang suporta ni Senga. Pero sang ulihi ginpaaresto niya si Lim sa balay sini. Si Querubin naman ginbantayan sa sulod sang iya ginaestaran sa Fort Bonifacio. Samtang, ang puno nga komandant sang Philippine Marine nga si Maj. Gen. Renato Miranda ginkuha sa pwesto makaligad ang duha ka adlaw.

Sadto man nga Pebrero 23, natiktikan sang pamunuan sang PNP ang plano sang pinuno kag mga pwersa sang PNP Special Action Force nga nakabase sa Camp Sto. Domingo, Sta. Rosa, Laguna nga magapasakup man sa rali nga ini para ipahayang ang pagtalikod nila sa rehimen. Gilayon nga ginkuha sa pwesto ang hepe sang SAF nga si Chief Supt. Marcelino Franco kag tatlo pa niya nga kaupdanan sa kumand nga sanday Senior Supt. Benjamin Magalong, Chief Insp. Ericson Dilag kag Insp. Ryan Paloma. Madason sini madamu nga iba nga upisyal sa mas manubo nga lebel sang mga kumand sang AFP kag PNP sa mga prubinsya ang ginbayluhan sa suspetsa nga indi sila tampad sa rehimen ng Arroyo.

Ang pagkakas kay Miranda sadtong Pebrero 26 ginsumalang sang aksyong

protesta sang mga pwersa sang 1st kag 2nd Marine Brigade sa sulod mismo sang kwartel sang Philippine Marine sa Fort Bonifacio, Taguig, Metro Manila. Si Gen. Nelson Allaga, ang ginbulos sang rehimen kay Miranda, amo ang isa sa mga upisyal sang AFP nga nadalahig sa dinayaay sa eleksyon sadtong 2004 sa Lanao.

Ginpangunahan ni Col. Ariel Querubin ang pagmartsa sang Marine sa sulod sang kampo agud ipabutyag ang ila pagpamamtuk sa "dimatarung" nga pagkuha kay Miranda. Pumwesto sila sa atubang ang upisina sang komandant nga dala ang isa ka tangke nga Simba kag tatlo ka *armored personnel carrier* (APC). Sa iya pagpahayag sa midya, nanawagan si Querubin sang pagsuporta sang pumuluho, nga maabtik nga ginsabat sang pila ka gatos nga nagtipon sa guwa sang kampo. Lakip diri sanday anay presidente Cory Aquino, anay bise-presidente Teofisto Guingona, mga senador kag kongresista kag iban pa nga kilala nga personalidad. Pila ka gatos man ang madasig nga nagtipon sa Ayala Avenue kag sa sulod sang UP Diliman.

Temporaryo nga naresolba ang protesta sa Fort Bonifacio sang mag-sugilanon ang mga upisyal sang Marine kag magkasugot sila nga magsunod sa *chain of command*. Pero pamatuod sang nagapadayon nga pagkatublag sa kubay sang Marine ang pagpabati-bati ni General Allaga sa iya pahayag matapos ang protesta nga ang ginakilala nila nga kurit sang ginasunod nga *chain of command* amo ang hepe sang Philippine Navy nga si Vice Adm. Mateo Mayuga.

Sa paglaum ni Arroyo nga maeng-ganyo pa gihapon ang mga disgustado nga upisyal kag pwersa sang AFP kag PNP, nagpangayo siya sang pagpakigdayalogo sa ila. Ginsug-alaw ini sang hangkat sang mga upisyal kag suldado nga anti-Arroyo nga ilakip sa dayalogo ang di pa naresolbar nga kontrobersyal "Hello Garci!" kag ang pagkadalahig sang pila ka heneral kag paggamit sa bilog nga institusyon sang AFP kag PNP sa pagdinaya sa nagligad nga eleksyon. Ginapamilit man sang grupo nga indi lang ang kinagamu sa kubay sang militar kag pulisya ang kinahanglan sugilanonan kundi pati ang katublagan nga nagaputos sa bilog nga katilingban nga ginabasol nila kay Arroyo.

Sa aktwal, wala sang natabo nga kudeta kag solo pagprotesta ang gindalahigan sang mga gin-aresto nga upisyal sang AFP kag PNP. Sa pihak sini, wala gihapon untat ang pagpangumbinsi sang rehimen sa ila mga tinawo nga may yara kuno nga alyansa ang PKP-BHB kag mga rebeldeng militar nga nagaplano sang kudeta. Naghakot pa gihapon ang Philippine Army sang 1, 200 nga loyalistang suldado halin sa Central Luzon kag Mindanao padulong sa Metro Manila para magserbi nga pwersa kontrakudeta kag tagadepensa sang Malakanyang.

Kadungan sini, ginbuyagyag ni Sen. Rodolfo Biazon nga may ara nga lima ka suldado nga ginmanduan sang pila ka upisyal sang AFP nga magpasulod sa Metro Manila sang apat ka pakete sang eksplosibo nga C-4 antes bawion ni Arroyo ang state of *national emergency*. Ginsuway sang lima ka suldado ang mandu nga ini sa kakulba nga ini pagagamiton sa mga terorista nga pagpamomba sang rehimen sa Metro Manila. Nagapanago sila subong bangud may order nga *shoot to kill* batuk sa ila bangud sa ila pagsuway. Siling ni Biazon, may ara pa nga 36 nga hubon nga ginmanduan man nga magdala sang mga palupok sa kabisera nasyunal. **AB**

Lt. Crispin Tagamolila

Halin sa reaksyunaryong hangaway pakadto sa hangaway sang banwa

Si Lt. Crispin Tagamolila isa ka upisyal sang Philippine Army sang magdesisyon siya nga mag-entra sa Bag-ong Hangaway sang Banwa (BHB) sadtong Marso 29, 1971.

Nagserbi siya sadto nga Finance Officer sang 1st Infantry "Tabak" Division. Ang yunit nga ini nga sadto nakabase sa Fort Magsaysay, Nueva Ecija ang solo nga dibisyon nga pang-away sadto sang Philippine Army.

Nagdaku sa prubinsya sang Ilo-ilo si Crispin Tagamolila. Nagtapos siya sang kolehiyo sa Ateneo de Manila bag-o magdesisyon nga mag-sulod sa AFP. Sa panahon nga ina, masami niya nga kadebate ang iya utod nga si Antonio, nga sadto isa na ka aktibista kag nangin puno nga editor sang *Philippine Collegian*, ang upisyal nga pahayagan sang mga estudyante sang University of the Philippines sa Diliman, Quezon City.

Bilang isa ka bataon nga upisyal sang AFP, ginadepensahan ni Lieutenant Tagamolila ang gubyrno kag nagasalig

sa "matawhay pamaagi sang pag-bag-o." Pero amat-amat siya namuklat sa kagarukan sang nagahari nga sistemang pangkatilingban ilabi na nga masaksihan niya ang pagdinaya ni Marcos sa eleksyon sang 1969. Labi pa siya nga namuklat sang gamitan sang kusog sang rehimeng Marcos ang mga demonstrasyon sadtong Enero 1970 nga nagresulta sa Bagyo sang Unang Kwarto.

Nangin abyan ni Lt. Tagamolila si Lt. Victor Corpus nga sadto sa Philippine Constabulary (subong amo ang Philippine National Police). Lunsay sila nga nagtuon sa Philippine Military Academy. Sang kis-a ginpangapinan nila sa debate ang kakinahanglanon sang pagbag-o sa sistemang sosyal, nabutang sila sa listahan sang mga ginadudahan nga "radikal" sa sulod sang AFP. Labi pa nga uminit ang mata sang AFP kay Lt. Tagamolila sang mag-entra si

Lt. Corpus sa BHB, dala ang mga armas halin sa ar-


mori sang PMA sadtong Disyembre 29, 1970.

Bilang upisyal sa pinansya sang reaksyunaryong hangaway, nahayag kay Lieutenant Tagamolila ang mga kagarukan sa sulod sang 1st ID kag sa sulod sang AFP. Akig katama siya sa sadto na lapnagon nga korapsyon nga nagabiktima sa mga ordinaryong suldado, pareho sang pagbuhin kag masami nga pagkaatrasar sa sweldo sang mga suldado para magamit sang mga upisyal sa negosyo ukon iban pa nga kagarukan. Nakita man niya ang maanomalya nga pagbenta sang mga kagamitan militar pati ang mga piyesa sang mga salakyan. Nagabaligaso siya sa kaakig sa mga kaso sang pagpangipit sa mga asawa sang mga suldado para mangin kerida sang mga upisyal. Nabuka man ang mga ilusyon ni Lieutenant Tagamolila. Indi na niya mabatas ang tuman kadamu sang mga kaso sang korapsyon sang mataas nga upisyal kag ang pagpamigos sa mga bataon nga upisyal kag ordinaryong suldado.

Sang may angot siya sa mga Pulang hangaway, madali nga nagdesisyon si Lt. Crispin Tagamolila nga bayaan ang Armed Forces of the Philippines kag nag-entra sa BHB. Hipos lang ang nangin pag-entra niya sa hangaway sang banwa bangud mas tumampok sadto ang balita bahin sa pag-agaw sang pila ka aktibista sa eroplano sang Philippine Airlines nga ginpalupad nila halin sa Maynila pakadto sa China sadtong Marso 30, 1971.

Sugod sadto, ginkilala si Lieutenant Tagamolila sa pangalan nga Ka Cely. Una nga gindestino si Ka Cely sa Isabela kon sa diin nagtungod siya bilang instruktur militar sang Regional Operational Command para sa Cagayan Valley. Ginkaptan niya ang Mobile Military-Political School (MMPS) sadtong 1971-72.

Sa luyo sang masa, labi nga nagdalum ang komitment ni Ka Cely sa pagrebolusyon. Kabahin sang pag-



Suhestyon nga saulugon ang mga makasaysayan nga kadalag-an sang paghimakas batuk sa modernong rebisyunismo halin 1956

20 Pebrero 2006-03-09

Ginasuhestyon namon nga mga nakapirma sa idalum, sa tanan nga mga partido kag organisasyong Marxista-Leninista-Maoista nga saulugon ang ika-50 nga anibersaryo sang paghimakas batuk sa modernong rebisyunismo kag maglunsar sang mga aktibidad sa katuyuan nga palig-unon ang aton panindugan nga isulong ang paghimakas nga ini, nga nagsugod sadtong 1956 sa pagbato sa rebisyunistang kaundan sang ika-20 nga Kongreso sang Communist

Party of the Soviet Union (CPSU) sadtong Pebrero 1956.

Naabot sang paghimakas sa modernong rebisyunismo ang panibag-o kag mas mataas nga halintang sang magsugod ang Dungganon nga Rebolusyong Pangkultura sadtong Mayo 1966. Ugaling, umpisa sang mamatay si Kaupod Mao sadtong Septyembre 1976, gin-atubang naton ang pagluib sa sosyalismo kag pagpanumbalik sang kapitalismo sa China. Gina-

"Tagamolila," halin sa pahina 9

pabag-o sang kaugalingon ni Ka Cely ang iya hugot sa tagipusuon nga pagpasakup niya sa hilikuton pangmasa kag hilikuton pangproduksyon. Muklat si Ka Cely nga halin siya sa reaksyunaryong militar kag kinahanglan niya magkaugat sa kubay sang masa. Ang una nga matutom niya nga ginhimo amo ang magtuon sang Iloko bangud indi niya ini kabisado. Ang nahibal-an niya nga mga pulong amo ang Hiligaynon kag Tagalog. Bangud matutom kag aktibo, madasig nga nakahibalo sini. Wala magdugay indi na hilmanon nga indi siya Ilokano.

Isa ka dahilan kon ngaa siya madasig nga makahibalo amo ang handum niya nga makabulig sa paglubad sa mga palaligban sang masa. Bangud natural lang nga ginasugilanon sang masa ang mga Pulang hangaway agud ipaabot ang ila mga problema sa mga banggianay sa duta, sa tunga sang mga grupo kag mga pamilya kag iban pa nga mga salalakot nga problema halin sa pag-asaway hay tubtub sa mga away pangpamilya. Napamahal sa masa si Ka Cely bangud sa natural niya masinadyahon kag mapainubuson. Malig-on siya kag mainalagdon. Pirme man niya nga ginakuha ang pinakamabug-at nga dalal-on, permi ginadumdom ang interes sang masa kag sang mga kaupod.

Sang mapilasan si Ka Cely sa isa ka engkwentro sadtong 1971, ginpakita sang masa ang pagmahal sa iya sang dumagsa sila nga may dala nga mga prutas, manok, baboy at iban pang mga bagay sa iya ginapahuwayan. Nakamuno siya nga "matam-is gid man magmahal sang masa."

Bilang instruktur kag kadre militar, ginpangunahan man ni Ka Cely ang pila ka madinalag-on nga taktikal nga opensiba sang Company B sang BHB sa Jones kag Echague, Isabela. Napatay si Ka Cely sa isa ka inaway sa Barangay Kalatbagen, Dipanung, Echague sadtong Abril 16, 1972.

Temprano man nga napatay si Ka Cely, padayon siya nga nagaserbi nga inspirasyon, ilabi na sa mga bataon nga upisyal, suldado kag tinawo sang AFP kag PNP nga nagapangita sang pagbag-o sa katilingban.

Ang iya halimbawa ang ginatib-ong sang mga nagaentra sa Lt. Crispin Tagamolila Movement (LTCM), isa ka rebolusyonaryong kahublagan nga nagaangot, nagabuyok kag nagaorganisa sa kubay sang mga suldado kag pulis sang reaksyunaryong armadong kusog. Sa diwa man sang LTCM, madamu nga mga upisyal, suldado kag pulis ang naangutan sa sulod sang AFP kag PNP nga nagabulig sa madamu nga paagi sa pagpabaskog sang BHB kag pagpasulong sang rebolusyon.

Sa atubang sang nagapadayon nga mga kundisyon nga nagduso sadto kay Lieutenant Tagamolila nga sundon ang rebolusyonaryong dalan, padayon man ang pagkamuklat sang madamu nga pareho niya nga bataon nga upisyal sang AFP. Pat-ud nga magadamu pa ang magadesisyon mag-entra ukon makig-angot kag makigbuligay sa tunay nga hangaway sang banwa. Nakahanda ang BHB nga batunon sa kubay sini, bilang mga suldado kag kumander, ang madamu pa nga pareho ni Lt. Crispin Tagamolila nga itumod ang ila mga pusil sa nagaharing sahi kag indi batuk sa ginapigos nga pumuluyo. **AB**

ang Soviet Union sa dalan sang kapitalistang pagpanumbalik.

Nagpalapnag ini sang populis-mong burges paagi sang mga kon-septo nga "partido sang bilog nga pumuluyo" kag "estado sang bilog nga pumuluyo" kag pasipismong burges sa mga kaisipan nga "malinong nga transisyon," "malinong nga kompetisyon" kag "malinong nga pagpangabuhì." Gingamit sini ang modernong rebisyunismo agud kontrahon kag paidalum nga samaron ang pangkalibutanon nga kahublagang komunista. Ginaduso sini ang "malinong nga pag-pangabuhì" bilang pangkabilugang linya agud pamatukan ang proletaryong internasyunalismo kag atakehon ang pangkalibutanon nga kahublagang komunista kag mga kahublagan para sa pungsodnon nga paghilway.

Sa pagpamuno ni Kaupod Mao zedong, maabtik nga ginpagguwa sang Partido Komunista sang China sadtong Abril 1956 ang editoryal sa People's Daily nga ginatiguluhan "Nahanungod sa Istorikong Inagihan sang Diktadurya sang Proletaryado." Ginpangapinan sini ang teorya kag praktika sang Marxismo-Leninismo batuk sa linya sang modernong rebisyunismo. Ginkundenar sini ang mga rebisyunista sa pagpalapta sang kagamo sa pangkalibutanon nga kahublagang komunista kag pagsulsol sang kinagamo kag pag-alsa batuk sa sosyalistang prinsipyo sa Poland, Hungary kag iban pang lugar sa Eastern Europe.

Ginduso sang delegasyon sang Partido Komunista sang China ang linya nga anti-rebisyunista sa mga pulong sa Moscow sang mga partido komunista kag partido sang ma-

mumugon sadtong 1957 kag 1960. Matapos sini, ginsaway kag ginsikway sini ang nagasanyog nga pagluntad sang monopolyong burukrata-kapitalismo kag sosyal-imperyalismo sa idalum sang malawig nga rehimen ni Brezhnev. Nagpakuno-kuno naman ang monopolyong burukrata kapitalismo samtang nagahimbunanay naman ang mga burukrata kag negosyante sa pagpangawat sa pang-estado nga sektor sang ekonomya. Sa relasyon internasyunal, ang mga rebisyunistang Soviet nangin sosyalista sa hambal kag imperyalista sa buhat.

Wala magpakuntento si Kaupod Mao sa pagsaway sa modernong rebisyunismo sang magtuhaw kag magdaku ini sa Soviet Union kag iban pa nga pungsod sa bloke ng Soviet. Gintun-an kag ginanalisa niya ang pagdaku sang modernong rebisyunismo, abangan ang pagpanumbalik sang kapitalismo kag konsolidahon ang sosyalismo. Samtang buhi si Kaupod Mao, napamunuan niya ang proletaryado kag pumuluyong Tsino sa sunod-sunod nga kadalag-an sa Dungganon nga Proletaryado nga Rebolusyong

Pangkultura sa pihak sang dalagku nga sablag kag gamhanan nga mga kaaway. Ugaling wala magdugay pagkamatay niya, inagaw sang mga kaaway sang proletaryado kag pumuluyong Tsino ang poder kag ginbaliskad ang iya proletaryo nga linyang rebolusyonaryo sa pagpasulong sang sosyalistang rebolusyon kag kontruksyon. Halin sadto, labi nga ginsunod sang China ang dalan sang kapitalistang pagpanumbalik.

Ang lubos nga pagpanumbalik sang kapitalismo sa China nagapamatuod sa kahustuhan sang ginatudlo ni Kaupod Mao nga ang sosyalismo mapaslawan sa tion nga mangibabaw ang rebisyunistang linya sa nagapamuno nga partido komunista ukon partido sang mamumugon kag sa ulihi magamadinag-on ang burgesya sa sulod sang partido kag estado sa pag-agaw sa poder kag pagkapukan sa proletaryado. Nagbilin si Kaupod Mao sang isa ka panublion nga magamit naton sa pagkontra kag pagpaslaw sa modernong rebisyunismo kag sa labing nga pagpauswag sa mga pwersa sang sosyalismo.

Sa bilog nga tuig 2006, dapat



Una nga halad sang Sine Proletaryo

Sining Marso 1, ginpagguwa sang Sine Proletaryo ang bidyo nga "People Power" nga nagatalakay sa nagapadayon nga paghimakas sang pumuluyong Pilipino para pukanon ang rehimen ni Gloria Macapagal-Arroyo.

Ang Sine Proletaryo ang bag-o nga sanga sa video production sang Kawanihan sa Impormasyon ng Partido Komunista ng Pilipinas. Ang "People Power" ang una nga guwa sang Signo, nga mangin regular nga programa sang Sine Proletaryo. Ang kulang-kulang 20 minutos n ga produksyon ginapalapnag sa porma sang VCD. AB

kita maglunsar sang pangkabilugan nga kampanya kag partikular nga mga aktibidad para sa edukasyong teoritikal kag pulitikal. Dapat naton atubangon ang halambalanon sang modernong rebisyunismo bilang pinakadalitan nga kaaway sang rebolusyonaryong kawsa sang sosyalismo. Dapat naton pangapinan ang mga kadalag-an nanday Kaupod Stalin kag Kaupod Mao sa sosyalistang rebolusyon kag konstruksyon.

Dapat naton liwat palig-unon ang rebolusyonaryong linya kag praktika ni Kaupod Mao sang nagapadayon nga rebolusyon sa idalum sang proletaryong diktadurya paagi sang Dungganon nga Proletaryo nga Rebolusyong Pangkultura. Dapat naton kundenahon ang pagtraidor sang mga maki-kapitalista nga Tsino sa sosyalismo kag sa proletaryong linya nga rebolusyonaryo ni Kaupod Mao. Dapat naton pamatukan ang nagkalain-lain nga tendensya nga rebisyunista nga lumihis sa syentipikong esensya sang Marxismo-Leninismo-Maoismo kag sa kongkreto nga pag-aplikar sini sa rebolusyonaryong praktika. Mahimo naton ini sa pagbato indilang sa mga tradisyunal nga ten-

densyang rebisyunista, klalsiko kag moderno, kundi pati sa mga masunod nga tipo pareho sang Hoxaismo kag Trotskyismo, nga nagadala sang rebisyunismo sa likod sang ultra-Wala nga guya. Dapat naton liwa nga palig-unon ang



aton determinasyon kag pagtinguha nga tumanon ang istorikong misyon sang proletaryado nga isulong ang sosyalistang rebolusyon kag konstruksyon. Tanan nga kalauton nga nagputos sa pungsod nga sadto yara sa pagpamuno sang mga rebisyunista magpainit sa atong determinasyon nga itibong ang Marxismo-Leninismo-Maoismo batuk sa modernong rebisyunismo kag isulong ang rebolusyonaryong kawsa sang sosyalismo.

Sang hingalit nga nagmadinalag-on ang modernong rebisyunismo batuk sa Marxismo-Leninismo kag proletaryo nga diktadurya, nakalunsar ang monopolyong kapitalismo sa pagpamuno sang imperyalismong US sang pinakamap-

intas nga atake batuk sa proletaryado kag pigos nga pumuluyo, pareho sang globalisasyon sang "hilway nga merkado," rasismo, pagpanglupig kag gerang agresyon. Bilang sabat sa pagsingki sang pangpamigos kag pagpanghimulos, ginapataas sang proletaryado kag pumuluyo ang ila pagbato paagi sang armadong paghimakas kag iban pa nga porma sang pagbato.

Internasyunalista nga katungdanan sang mga partido Marxista-Leninista-Maoista nga maghiliusa kag pukawon, organisahon kag pahulagon ang proletaryado kag pumuluyo sa tagsa nila ka mga pungsod kag sa bilog nga kalibutan sa pagbato para sa pungsodnon nga kahilwayan, demokrasya kag sosyalismo batuk sa imperyalismo,

rebisyunismo kag reaksiyon. Paagi sang pagsaulog sang 50 tuig nga paghimakas batuk sa modernong rebisyunismo, liwat namon ginapaligon ang amon panindugan nga magpursiger sa rebolusyonaryong

paghimakas kag magtinguha nga agumon ang nagapadaku nga mga kadalag-an sa ubay sang Marxismo-Leninismo-Maoismo.

Itibong ang rebolusyon batuk sa imperyalismo, rebisyunismo kag reaksiyon!

Pasidunggan ang Dungganon nga Proletaryong Rebolusyong Pangkultura!

Mabuhay ang proletaryong internasyunalismo!

Mabuhay ang Marxismo-Leninismo-Maoismo!

Mga pauna nga nagpirma:

Partido Komunista sang India (Maoista); Partido Komunista sang Pilipinas; Partido Komunista sang Turkey/Marxista-Leninista; Ligang Komunista sang Indonesia AB



Kababaihan sa China, ginhilway sang rebolusyon

Ang pagpahilway sa kababaihan amo ang isa sa mga ginhunga nga kadalag-an sang pungsodnon-demokratiko kag soyalistang rebolusyon sa China sa pagpamuno sang Chinese Communist Party (CCP).

Lubos nga ginkilala kag ginhata-gan importansya sang CCP ang papel sang kababaihan, lunsay sa pagpasulong sang rebolusyon para tapuson ang sadto mapiguson nga sistemang malakolonyal kag malapyudal kag sang sosyalistang rebolusyon kag konstruksyon. Suno kay Mao Zedong, tagapangulo sang CCP kag dungganon nga manunudlo nga Marxista-Leninista: "Kon nag-alsa ang kababaihan sa bilog nga pungsod, magamadinalag-on ang rebolusyong Tsino."

Antes ang rebolusyon, tuman kanubo ang kahimtangan sang kababaihang Tsino sa sosyedad. Suno kay Kaupod Mao, kon ang kalalakihan nga Tsino halin sa anakbalhas sa panahon nga ato ginadominar sang tatlo ka awtoridad-pulitikal nga awtoridad, awtoridad sang linahi kag pamilya kag awtoridad sang relihiyon-ang kababaihan nga Tsino dominado

sang ikaapat-ang awtoridad sang kalalakihan.

Sa daan nga China-antes ang kadalag-an sang bag-o nga demokratikong rebolusyon-wala sang signipikanteng papel ang kababaihan sa produksyon. Halos wala sila sang papel sa industriya. Labaw nga ginapakagamay ang papel nila sa produksyong agrikultural. Bangud sa kawad-on sang gahum sa produksyon, ginabilang sila nga manubo sa lebel sang kalalakihan kag wala sila sang gahum nga magpanag-iya, magdumala, magdesisyon kag magpamuno.

Ang kadutaan sa China sadto monopolisado sang dalagku nga agalon nga mayduta. Pero labaw pa sa kahimtangan nga ini, wala kinamatarung nga magpanag-iya ukon magdumala sa duta ang kababaihan. Solo sa mga lalaki lamang ginapanubli kag ginapadumala ang mga

kadutaan sang ila mga amay.

Nabugtawan na ang kababaihan pangbalay lang. Halos wala sila sang kinalain sa ulipon. Ang mga ina para lamang sa pagtatap sang mga anak, kag sila kag ila mga anak nga babae para lang sa pag-asikaso sang mga hilikuton pangbalay kag mga hilikuton pareho lang sang pang-alila sang mga hayop sa kulungan kag paghablon. Wala man sila ginapa-eskwela. Wala sila ginapaidalum sa sosyal nga aspeto sang pagpangabuhi. Halimbawa, kon ang imol ginadumili sa mga kahiwatan sa templo nga ansestral, ilabi nga ginadumili didto ang kababaihan.

Pwersado sila nga magpakasal sa lalaki nga ginpinili sang ila mga ginikanan kag sang mga tagapares. Wala sila sang kinamatarung nga liwat mag-asawa kon nabyuda na sila. Sa pihak nga bahin, hilway ang mga lalaki nga ilisan sila ukon magkuha sang iban nga babaye kag isaka sa balay ang mga ini upod ang una nga asawa nga masami ginahimo sang mga agalon nga mayduta. Masami halin sa pinakaimol nga pamilya ang mga dugang nga asawa (*concubine*). Ang *concubine* wala ginabilang nga parte sang pamilya ukon wala ginakilala nga ina bisan magbun-ag sila sa balay nga ina.

Kon ang mga asawa nga babaye magatigulang, nagabalatian ukon indi gani sa lantaw sang lalaki wala na sang pulos, pwede nga basta na lang sila pahalanon sa balay. Pareho sang duta, pagpanag-iya kag balali-gyaon ang pagbilang sang mga agalon nga mayduta sa kababaihan. Ang pagkuha sang agalon nga mayduta sang anak nga babaye sang mga mangunguma bilang *concubine* pamaagi agud labi nga makontrol ang mga mangunguma sa iya nasakupan.



**Mga kadalag-an sang kababaihang Tsino**

Antes pa ang pormal nga pahayag nahanungod sa pagkatukod sang People's Republic of China sadtong Oktubre 1, 1949, pormal nga ginadokumento sa Common Program of the Chinese People's Consultative Conference (CPPCC) nga gin-aprubahan sa Una nga Sesyon Plenaryo sang CPPCC sadtong Septyembre 29, 1949 sa Biejing ang paghatag importansya kag pagpasaka sa kahimtangan sang kababaihan. Naplastar bilang pang-anum nga artikulo sang dokumento ang probisyon nga:

"Pagagub-on sang People's Republic of China ang pyudal nga sistema nga nagaulipon sa kababaihan. Pagahatagan sila sang kinamatarung kapareho sang kalalakihan sa patag sang pulitika, ekonomya, kultura, edukasyon kag sa sosyedad sa pangkabilugan. Ginapatuman man ang kinamatarung sa pag-asawa lunsay sang kababaihan kag kalalakihan."

Malaparan nga ginasapraktika sa bilog nga China ang mga programa nga nagpataas sa kahimtangan sang kababaihan sa lain-lain nga patag sang ila sosyedad.

Sa produksyon. Sa pagkatukod sang People's Republic of China, ginlunsar ang repormang agraryo sa China. Lakip ang kababaihan sa mga nakabenepisyo sa duta nga ginpanagtag sang bag-ong gubyerno. Sa kasunod nga pagpasulong sang pagpataas sang lebel sang kooperasyon tubtub sa kolektibisasyon kag pagtransporma bilang pangpubliko nga propyedad sang mga kasangkapan sa produksyon sa panahon sang sosyalistang konstruksyon, nahatagan-dalan ang labi pa nga pag-entra sang kababaihan sa produksyon.

Minilyon nga kababaihang Tsino, nga sa sulod sang pila ka siglo naku-long lamang sa ila mga balay, ang nagpasakup sa kolektibong hilikuton

sa produksyon. Bangud sa kagamhanan nga dulot sang ila ikasarang mag-amot sa produksyon sang katilingban, madasig nga nagtaas ang kahimtangan sang mga babae nga Tsino sa ila mga pamilya, linahi, komunidad kag sa sosyedad. Kag indi pareho sang una, padayon nga naglapad ang ila panan-awan kag kaalaman kadungan sang paglapad sang ila mga hilikuton kag pagtaas sa lebel kag serbi nila sa katilingban.

Sa Pungsodnon nga Programa para sa Pagpauswag sang Agrikultura (National Program for Agricultural Development) sa panahon na sang sosyalistang konstruksyon sa China halin 1956, luwas sa paghatag sang natalana nga isip sang adlaw sa kababaihan sang ila pagpasakup sa mga hilikuton sa agrikultura, nakasaad man ang prinsipyo sang "pareho nga kita kabaylo sang pareho nga trabaho" sa kababaihan bisan diin man sila magtrabaho, kadungan ang pagkunsiderar sang ila ikaayong lawas.

Partikular man nga nakasaad sa Common Program ang probisyon nahanungod sa pag-amlig sang espesyal nga interes ukon kinahanglanon sang kababaihan sa mga pabrika.

Bangud sa paghatag patamod sang gubyerno sang pumuluyo sa papel sang kababaihan, halin sa pinakanubong nga lebel sang partisipasyon, ang numero sang mga babae sa kaumhan nga nagapartipar sa produksyon nagaabot na sa 70% sa umpisa sang pagsublak sang sosyalismo sadtong 1958. Kag sa kasyudaran naman, nagtaas pakadto sa 3.3 milyon (550% pagtaas halin sadtong 1949) ang numero sang kababaihan nga mamumugon sa panahon man nga ina.

Pagdesisyon, pagpamuno, kinamatarung makapili kag mapilian. Daku nga kadalag-an para sa

kababaihan nga sa una nga sesyon plenaryo pa lamang sang CPPCC sadtong 1949, may 69 nga babaye ang nagapasakup (10.4% sang kabilugan nga delegasyon). Ginatiglawas sang mga ini sa pulong ang kababaihan sa bilog nga China kon sa diin ginahambalan ang konstruksyon sang pungsod. Napilian sa importante nga pusisyon sa plenaryo ang pila ka babaye nga delegado. Naglapad pa ang partisipasyon diri sang kababaihan sa mga masunod pa nga tuig.

Sa Electoral Law of the People's Republic of China nga gin-aprubahan sadtong 1953, ginpasar nga layi ang pareho nga kinamatarung sang mga babaye nga magpasakup sa eleksyon. Sa eleksyon lokal nga ginlunsar sa tuig nga ini, masobra 90% sang kababaihan ang bumuto kag naglabot sa 17% sang mga napilian ang mga babaye. Sa gilayon nga eleksyon kasunod para sa mga tiglawas sa National People's Congress, nag-abot sa 12% sang mga napilian mga babaye. Sa kubay sang mga pungsodnon nga minorya nga sadto pinakakonserbatibo kag mapigugon sa halambalanon sang kababaihan, 11% sang kabilugan nga tiglawas mga babaye.

Edukasyon. Labi nga nagtaas ang lebel sang literasiya sa kubay sang kababaihan. Antes ilunsar ang rebolusyon, 90% sang kababaihan nga Tsino ang indi makahibalo mag-sulat kag magbasa. Ginlunsar sang bag-o nga gubyerno sang pumuluyo ang malaparan nga kampanya para pataason ang lebel sang literasiya, edukasyon kag kultura. May mga pagtuon sa gab-i kag pati man sa mga oras sa adlaw nga libre ang mga mamumugon. Paglabot sang 1958, ang mga pagtuon sa kaumhan kag kasyudaran nagbunga sang 16 milyon nga kababaihan nga nakahibalo magbasa.

Kasal kag pag-asawa. Ginhimo ang bag-o nga Layi sa Pag-asawahay



sang 1950 nga nagakilala sa hilway kag pareho nga kinamatarung sang mga babaye kag lalaki sa pag-asawahay base sa paghigugmaanay, monogamy (may isa ka asawa lang) kag naghatag-proteksyon sa mga lehitimo nga kinamatarung sang mga babaye kag bata. Ginbasura sang layi nga ini ang pyudal nga sistema sa pag-asawahay sa China sadto kon sa diin pagsulundan ang ginaareglo kag pwersahan nga pagpakasal kag superyoridad sang lalaki sa babaye nga asawa kag mga anak. Ginasulong man sang layi nga ini ang pareho nga kinamatarung sang mag-asawa sa pagpanag-iyag kag diborsyo.

Signipikante nga nagnubo ang pagpangsakit sa mga asawa kag bata kag iban pa nga klase sang pagpamintas. Nagbunga man ini sang pagdula sa daku nga numero sang ginpilit kag mapiguson nga mga kasal sa daan nga balayon tubtub sa dalayon nga nawasak ang linibo-katuig nga sistemang pyudal nga pag-asawahay.

Ikaayong lawas. Ginakampanya kag ginsulong ang planado nga pagbata agud amligan ang ikaayong lawas sang kababaihan. Sa amo man, pamaagi ini agud mahatagan sang mas daku nga kahigayunan kag oportunidad ang kababaihan nga magpartisipar sa hilikuton kag angot sa sosyedad kag makatuon kag indi lang mahigot sa pagpamata kag pag-alila sang mga bata. (Luwas pa ini sa katuyuan nga maplano ang ekonomya base sa santo nga pagdaku sang populasyon sa katuyuan nga bastante ang pagkaon, trabaho kag seguridad para sa pumuluyo.)

Pagdumili sang prostitusyon. Gilayon nga gindumili sang PRC ang prostitusyon sa China. Sa bilog nga China, ginlunsar ang kampanya batuk sa prostitusyon nga nagabiktima sa linibu-libo nga babaye. Ginpasara ang mga balay-prostitusyon. Ginbulong ang mga balatian nga

babayeng prostityut. Ginhatagan sila sang pagtuon, ginbuligan mabuhi sang normal kag ginhatagan sang oportunidad nga makakita sang iban nga palangitan-an. Sa sulod lang sang malip-ot nga panahon sa sosyalistang konstruksyon sang China, gilayon nga nawasak kag napanas ang prostitusyon sa pungsod.

Sa proseso sang paglunsar sang rebolusyon sa China kag sa panahon nga naagum nila ang kadalag-an, nahilway kag nahatagan importansya ang kababaihang Tsino kag naangkon nila ang pagtaas sang ila kahimtangan sa pamilya, linahi, komunidad kag sa bilog nga sosyedad. Ginkakas ang daan, pyudal kag patri-

yarkal nga sistema nga pila ka siglo nga naglapad sa kinamatarung kag dignidad sang mga babae sa China. Nag-angkon ang kababaihan sang kagamhanan, pagtaas sang ila mga ikasarang kag pareho nga pagpartisipar sa pulitika, pang-ekonomya, siyentipiko-edukasyunal-kultural kag iban pa nga aspeto sang pangabuhig pangkatilingban sa China. Ginsulong nila ang kultura sang pagka-palareho. Ginapakita sang eksperensya sa China nga solo sa pagdaug sang pungsodnon-demokratiko kag sosyalistang rebolusyon makaptan sang kababaihan ang lubos nga paghilway kadungan sang tanan nga iban pang pumuluyo sa katilingban. **AB**

Pagbisita ni Bush sa India kag Pakistan, ginsugata sang mga protesta

"**K**amatayon para kay Bush!" "Bush, manugpatay sang tawo; magpauli ka na!" Ini ang singgit sang ginatus-libo nga pumuluyo sang India kag Pakisatan paghugpa ni Pres. George W. Bush sang US sa ila pungsod sadtong una nga simana sang Marso. Nagkadto si Bush sa India sadtong Marso 1-3 kag sa Pakistan sadtong Marso 4 kag 5 sa iya pinakauna nga upisyal nga pagbisita sa duha ka pungsod.

Sa iya pagbisita sa India, tuyo ni Bush nga kuhaon ang simpatiya sang pumuluyo kapin pa kay may estratehikong balor ang pungsod nga ini sa sitwasyon nga pulitiko-militar sa Asia kag bilog nga kalibutan. Pero sari-sari nga protesta sang linibu-libo nga pumuluyo ang nagsug-alaw sa iya. Naglab-ot 100,000 ang nagtambong sa demonstrasyon sa Plaza sang Central New Delhi sa India. Upod sa ginapamatukan sa aksyon protesta ang mapanggera nga mga polisiya sang gubyernong US kag ang pagpanalakay kag pananakop sini sa Iraq kag Afghanistan.

Dumeretso sa Pakistan si Bush sa pihak sang pagpamomba sa ila embahada didto sadtong Marso 2 na ginkamatay sang tatlo sini ka empleyado. Tulad sa India, malapad man ang mga aksyon protesta nga nagsugata kay Bush sa Pakistan. Sa sobra nga kahadlok diri ni Bush kag iya idu-ido nga si Pres. Pervez Musharraf, ginpadakup kag ginpapreso nila ang isa ka lider sang oposisyon kag 350 aktibista nga nagapakamalaut sa US. Napilitan nga maghugpa sa Islamabad (sentro sang Pakistan) ang eroplano nga ginasakyan ni Bush nga patay ang suga sa tunga sang napakahugot nga mga tikang pangsiguridad. Gilayon siya nga nagtago sa embahada sang US didto. **AB**

Pinakaulihi nga mga kaso sang pasista nga pagpamigos

INDI magnubo sa 17 ka tawo sa nagkalain-lain nga parte sang Pilipinas ang ginpatay halin Enero sa wala untat nga pasistang kampanya sang rehimen Arroyo batuk sa mga progresibong organisasyon kag partido kag ginasuspetsahan nga mga sibilyan nga tagasupporta sang rebolusyunaryong hublag. Isa ka progresibo nga lider man ang ginkuot kay indi pa makit-an.

Ginkuot sang pila ka armado nga lalaki sadtong gab-i sang Marso 3 sa Baler, Aurora si Joey Estriber, 35, pangkabilugan nga sekretaryo sang Bagong Alyansang Makabayan (BAYAN) sa prubinsya. Suno sa mga nakasaksi, gintayaan siya sang pusil kag pwersahan nga ginsakay sa isa ka pula nga Kia Besta nga wala sang plaka. Mga elemento sang 48th IB ang ginasuspetsahan nga nagkuot kay Estriber. Asta subong wala pa siya nakit-an kag ginakahadlukan nga patay na.

Sa Quezon, wala sang kaluoy nga ginpatay sang *death squad* sang rehimen sadtong Pebrero 28 si Napoleon Pornasodoro, 45, manunudlo sang Quezon National High School kag pinuno sang Southern Tagalong Teachers for Development (STATEMENT). Myembro man si Pornasodoro ng National Council sang Alliance of Concerned Teachers (ACT) kag daan nga upisyal sang BAYAN-Quezon.

Sa Northern Samar, ginkuot, ginbakol kag gin-

patay sang mga elemento sang 20th IB sadtong Pebrero 25 ang sibilyan nga si Jose Agas, 65, sa Barangay E. Duran, Bobon matapos ang sunod-sunod nga engkwentro sa tunga sang militar kag Bag-ong Hangaway sang Banwa. Ginpatay man sadtong Pebrero 27 sang mga ginasuspetsahan nga militar si Oswald Galos, barangay kapitan sang Trujillo, Bobon kag myembro sang Bayan Muna. Sobra 2,000 katawo na ang pwersahan nga nagbakwit halin nga umpisahan sang 20th IB, 82nd Recon Coy kag 63rd IB sadtong Pebrero 9 ang malaparan nga operasyong militar kag paglapas sa mga tawhanong kinamatarung sang pumuluyo sa Bobon, Lope de Vega kag Cartarman sa Northern Samar kag sa Oquindo District, Calbayog sa Samar.

Samtang, ginbalita ni Jorge "Ka Oris" Madlos, tagapamaba sang NDF-Mindanao, nga halin Enero sang tuig nga ini naglab-ot na sa 14 nga lider masa sa isla ang ginpamatay sang mga armadong gaway sang pasista nga rehimen Arroyo. Lakip diri ang tatlo ka lider sang komunidad sa Makilala, North Cotabato; isa ka lider sang asosasyon pangtransportasyon sa Davao City; kag 10 ka lider mangunguma-- isa sa Cagwait, Surigao del Sur; tatlo sa San Luis, Agusan del Sur; isa sa Bislig City; isa sa Kitcharao, Agusan del Norte; kag apat sa Cecilia, Bayugan, Agusan del Sur.

Wala aksyon sang gubyrno, ginpakamalaut sang biktima sang pagpanglugos

NAGHAMBAL sa atubang sang mas-midya sadtong Marso 4 ang Pilipina nga ginhimuslan sang apat ka suldado nga Amerikano sa Subic, Zambales sadtong Nobyembre 1, 2005 para kundenahon ang pagbalewala sa iya kaso sang rehimen Arroyo. Sa isa ka interbyu sang masmidya, ginsiling sang biktima nga ginahingalanan nga "Nicole" sang ABS-CBN nga labi niya nga ginkaakig nga mas ginapaboran pa sang rehimen ang "maayo nga relasyon" sa tunga sang US kag Pilipinas sangsa pagpangita sang hustisya sa iya nga kaso.

Ginabilang niya nga pagpagwapa sang imahen kag pagpanabon sa mga pagpasilabot kag mga krimen nila sa pumuluyo ang pagpasakup

sang mga suldadong Amerikano sa *search and rescue operations* sa Guinsaugon, St. Bernard, Southern Leyte nga naigo sang *landslide*. Ginhingyo niya sa gubyrnong Arroyo nga iinsister sini ang kustodiya sa apat ka akusado nga suldadong Amerikano sa baylo nga itugyan lang sa mga awtoridad sang US ang pag-uyat sa ila. Pormal nga gin-surender sang gubyrnong Arroyo sa US sadtong Enero ang kinamatarung sini nga uyatan ang mga akusado. Ginhimutig man sang biktima ang mga nagalapta nga balita nga nabayaran na siya para bawion ang reklamo. Siling niya igapursiger niya ang kaso bisan indi siya buligan sang gubyrno.

Manugsilhig sang MMDA, nagprotesta

NAGALAB-OT sa 200 manugpanilhig nga empleyado sang MMDA (Metro Manila Development Authority) ang nagprotesta sining Marso 5 bangud sa masobra isa ka tuig nga pagkaatrasar sang ila Cost-of -Living-Allowance (COLA). Nagtindog sila sa tunga sang haywey kag ginaabangan nila sang 20 minutos ang mga salakyan sa EDSA malapit sa upisina sang MMDA sa Magallanes, Makati City. Ang protesta ginpamunuan sang ila organisasyon nga Sakamay, nga subong nagakipagnegosasyon sa MMDA para sa isa ka Collective Negotiating Agreement (CNA). May ara nga mas o menos 1,000 manugpanilhig sa idalum sang MMDA.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon

Tuig XXXVII No. 5

Marso 7, 2006

www.philippinerevolution.org

Editorial

Pamatukan ang terorista nga pagginahum sang rehimeng Arroyo

Makaligad lang sang isa ka simana, napilitan si Gloria Arroyo nga bawion sining Marso 3 ang iya gindeklarar nga proklamasyon nga nagapaidalum sa bilog nga pungsod sa "state of emergency." Suno sa iya mga idu-ido, nadula na kuno sa kadak-an ang pamahug sa seguridad sang pungsod. Gindeklarar niya ang Presidential Proclamation 1017 sadtong Pebrero 24.

Ang matuod, ginsumalang sang malapnagon kag mabaskog nga pagpakamalaut ang PP 1017 sa sulod kag guwa sang Pilipinas. Ginkwestyon ang ligalidad sang deklarasyon. Wala ginbaton ang mga ginasinging nga basehan sini. Ginsuway ang mga pagdumili sa rali kag iban pa nga pagprotesta. Labing naglapad ang pagbato sang pumuluyo kag mga panawagan nga patalsikon si Arroyo.

Ginhimo ni Arroyo ang pakitang-tao nga pagbawi sa PP1017 bangud nabudlayan ini nga atubangon ang malaparan nga pagkunda, kag agud unahan ang anuman nga posible nga desisyon sang Korte Suprema bahin diri. Pero padayon ang iya pagpaniplang, pagbinutig kag pagpamigos. Wala ini sang kinalain sa paltik nga pagdula ni Marcos sa layi militar sang ideklarar niya ang "normalisasyon" sadtong 1981.

Insigida sa pakuno-kuno nga pagbawi sa PP 1017,

gindeklarar ni Arroyo kag iya mga tinawo nga padayon nga lagson sini ang kuno mga "kahimbon sa kudeta." Kadungan sini ginpagguwa ang mga mapiguson nga regulasyon para sa masmidya agud pat-uron nagasunod ini sa mga "talaksan" sang rehimen. Padayon nga target sang mapiguson nga mga tikang ang malapad nga nagahiliugyong prente sang mga patriyotiko, demokratiko kag progresibong pwersa kag iban pa nga pwersa nga nagabato sa rehimen.

Nagapamahug ang rehimen nga igabalik sini ang PP 1017 ukon kapareho sini "kon ginahingyo liwat sang kahimtangan." Padayon ang lapnagon nga kontra-open-siba sang nagaharing papet kag pasista nga rehimeng Arroyo para ipabilin ang kaugalingon sa poder kag ipataw ang mas malaut pa nga mga pagsulundan nga antinasyunal, kontra-demokratiko kag kontra-pumuluyo.



**Mga tampok
sa isyu nga ini...**

**Pasismo sa idalom sg
Proclamation 1017**
PAHINA 3

**Sabat sg BHB sa
Proclamation 1017**
PAHINA 5

**"People Power,"
una nga halad sg Sine
Proletaryo** PAHINA 12

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com